

18. E-B I L T E N

18. Е-Б И Л Т Е Н

18. E-B I L T E N

NOVOSTI U EVROPSKOM PARLAMENTU I EVROPSKOJ UNIJI
НОВОСТИ У ЕВРОПСКОМ ПАРЛАМЕНТУ И ЕВРОПСКОЈ УНИЈИ
NOVOSTI U EUROPSKOM PARLAMENTU I EUROPSKOJ UNIJI

Oktober - Novembar - Decembar
Октобар - Новембар - Децембар
Listopad - Studeni - Prosinac

2025. godine

S a d r Ź a j

Uvod.....	3
Paket proširenja za 2025. godinu pokazuje napredak ka članstvu u EU ključnih partnera u procesu proširenja.....	4
Нацрт закључака Европског савјета о Босни и Берцеговини: Критиковали спорост реформи.....	8
<i>Posebni dio</i>	
Предсједавајући Заједничке комисије за европске интеграције ПСБИХ Зденко Ћосић учествовао је у Подгорици на регионалној конференцији о улози ефикасног парламентарног надзора у унапређењу процеса приступања ЕУ.....	10
U Parlamentarnoj skupštini BiH održana XXII Konferencija parlamentarnih odbora za europske integracije/poslove zemalja obuhvaćenih procesom stabilizacije i pridruživanja u Jugoistočnoj Europi (COSAP).....	12
Delegacija Parlamentarne skupštine BiH učestvovala je na 74. plenarnom sastanku COSAC-a u Copenhagenu.....	15

-UVOD-

E-Bilten Sektora za Europsku uniju Parlamentarne skupštine Bosne i Hercegovine, objavljuje se za svako tromjesečje u godini i sadrži sveobuhvatan pregled političkih, ekonomskih, pravnih i socijalnih prilika unutar Europske unije, te informacije o događajima koji su važni i mogu biti od značaja za Bosnu i Hercegovinu u procesu integriranja u Europsku uniju.

Veliki doprinos političkom, ekonomskom i društvenom razvoju Bosne i Hercegovine predstavlja aktivno učešće i uspješno djelovanje Parlamentarne skupštine Bosne i Hercegovine njenim prisustvom i radom u institucijama Europske unije, posredstvom kojeg se ostvaruje uloga Bosne i Hercegovine kao države koja pretendira postati punopravna članica Europske unije. U posebnom dijelu, E-Bilten sadrži važne informacije o događajima i temama vezanim za navedene aktivnosti.

Izbor vijesti nije rezultat ličnih preferencija autora niti bilo koja vrsta favoriziranja političkih stranaka ili pojedinaca. Vijesti se biraju hronološki, na osnovu njihove aktuelnosti i značaja u određenom vremenskom okviru, bez pristrasnosti.

Iz razloga ravnopravnosti dva pisma i tri službena jezika u Bosni i Hercegovini, E-Bilten je sačinjen u mješovitom izdanju.

PAKET PROŠIRENJA ZA 2025. GODINU POKAZUJE NAPREDAK KA ČLANSTVU U EU KLJUČNIH PARTNERA U PROCESU PROŠIRENJA



Evropska komisija usvojila je 04.11.2025. godine godišnji *Paket proširenja* kojim se daje sveobuhvatna procjena napretka koji su partneri u procesu proširenja ostvarili tokom proteklih dvanaest mjeseci što potvrđuje da je proširenje i dalje visoko na listi prioriteta Evropske unije, kao i da je pristupanje novih država članica sve ostvarivije.

Dosljednost i pristup zasnovan na zaslugama ključ su uspješnog procesa pristupanja Evropskoj uniji. Crna Gora, Albanija, Ukrajina, Republika Moldavija, Srbija, Sjeverna Makedonija, Bosna i Hercegovina, Kosovo, Turska i Gruzija nastavljaju put ka Evropskoj uniji. Brzina njihovih reformi, posebno u oblasti demokratije, vladavine prava i osnovnih prava, direktno utiče na dinamiku pristupanja. Ovaj napredak koristi kako državama kandidatkinjama tako i trenutnim članicama Unije, jer podstiče prosperitet, demokratiju, bezbjednost i stabilnost, dok istovremeno otvara nove mogućnosti za građane i privredu, poput strateških investicija i pristupa Jedinstvenom tržištu.

Predsjednica Evropske komisije Ursula fon der Lajen izjavila je: „Posvećeniji smo nego ikad da proširenje EU pretvorimo u stvarnost jer veća Unija znači snažniju i uticajniju Evropu na svjetskoj sceni ali taj proces mora da ostane i ostaće zasnovan na zaslugama. Naš paket donosi konkretne preporuke svim partnerima, a njima

poručujemo: pristupanje EU je jedinstvena ponuda. To je obećanje mira, prosperiteta i solidarnosti. Uz prave reforme i snažnu političku volju, svi vi možete iskoristiti ovu priliku.“

U godišnjem Paketu proširenja za 2025. godinu, koji je usvojila Evropska komisija, ocjenjeno je da Bosna i Hercegovina u proteklih godinu dana nije ostvarila značajan napredak na putu prema Evropskoj uniji.

Potpredsjednica Evropske komisije i visoka predstavnica Evropske unije za vanjske poslove i sigurnosnu politiku Kaja Kallas i komesarka za proširenje Evropske unije Marta Kos kazale su kako je Bosna i Hercegovina među zemljama koje nisu ostvarile stvarni napredak u protekloj godini, zajedno sa Srbijom, Sjevernom Makedonijom i Kosovom.

Visoka predstavnica i potpredsjednica Evropske komisije Kaja Kallas prilikom predstavljanja Paketa o proširenju naglasila je da je pristupanje Evropskoj uniji „pravičan, ali i izazovan proces koji se temelji na ostvarenim rezultatima“. Kallas je napomenula da su različiti razlozi zakočile ove zemlje u napretku na EU, a da su političke krize obilježile ovaj period u Bosni i Hercegovini, što je i utjecalo na nepostojanje napretka.

Kos je navela kako će u narednom periodu od zemalja kandidatkinja očekivati veći progres, ali da je potrebno i Uniju pripremiti za proširenje. “Države moraju provesti stvarne, dubinske reforme i uskladiti se sa stvarnim demokratskim standardima i vrijednostima, a to mora biti popraćeno usklađenosti sa vladavinom prava i jasnim povezanjem sa geopolitičkim smjerom EU”, kazala je Kos.

Naglašeno je da su poštivanje vladavine prava, demokratije i temeljnih prava građana i dalje ključ za ostvarivanje ciljeva u procesu pristupanja za sve zemlje, kao i da će u budućim ugovorima o pristupanju biti ugrađene jače zaštitne mjere kako bi se osiguralo da sve zemlje poštuju sve vrijednosti i temeljna prava EU.

”Evropska unija se priprema za prijem novih članica po prvi put nakon više od decenije, a proširenje Unije u narednim godinama postaje realna mogućnost. Njegova hitnost, imajući u vidu geopolitičke promjene i potrebu za očuvanjem mira i stabilnosti na evropskom kontinentu, čini ga jednim od najvećih prioriteta Evropske unije” izjavio je Luigi Soreca, šef Delegacije Evropske unije i specijalni predstavnik EU u Bosni i Hercegovini.



Soreca podsjeća da su potvrda tog opredjeljenja i nedavne posjete Bosni i Hercegovini visokih evropskih zvaničnika – predsjednice Evropske komisije Ursule von der Leyen, predsjednika Evropskog vijeća Antonia Coste, visoke predstavnice i potpredsjednice Kaje Kallas, te komesarke za proširenje Marte Kos.

U tekstu se navodi da među zemljama koje teže članstvu u EU postoje različiti nivoi napretka. Crna Gora planira okončati pregovore o pristupanju do kraja 2026. godine, Albanija do kraja 2027, dok Bosna i Hercegovina, uprkos značajnom potencijalu, još uvijek nije formalno započela proces pregovora.

U Izvještaju o Bosni i Hercegovini, objavljenom u okviru Paketa o proširenju, prepoznati su određeni pozitivni pomaci – poput usvajanja zakona o zaštiti podataka i graničnoj kontroli te potpisivanja statusnog sporazuma s Frontexom, koji je omogućio angažman više od stotinu službenika Frontexovog Stalnog korpusa u BiH radi podrške Graničnoj policiji. Međutim, cjelokupna slika za 2025. godinu ističe nedostatak napretka. “Izvještaj bi trebao poslužiti kao suštinski vodič koji može pomoći Bosni i Hercegovini da nadoknadi izgubljeno vrijeme. Postoje određene naznake da bi u predstojećem periodu Bosna i Hercegovina mogla usvojiti Zakon o VSTV-u BiH i Zakon o sudovima koji moraju biti usvojeni u cijelosti u skladu s evropskim standardima, prije svega prema preporukama Venecijanske komisije i Evropske komisije, te imenovati glavnog pregovarača i pregovarački tim, čime bi se stvorile pretpostavke za održavanje prve Međuvladine konferencije i otvaranje pristupnih pregovora” izjavio je Soreca.

Kada je riječ o imenovanju glavnog pregovarača i pregovaračkog tima, odluku o tome donosi Bosna i Hercegovina u skladu s Ustavom i relevantnim propisima.

“Za Evropsku uniju je najvažnije da Bosna i Hercegovina ima pouzdanog sagovornika s Evropskom komisijom. Da bi se to postiglo, glavni pregovarač i pregovarački tim moraju moći nastupati jednim glasom, u ime cijele zemlje, te imati resurse, kapacitete i znanje za efikasno vođenje pregovora” istakao je Soreca. Prema njegovim riječima, prva Međuvladina konferencija mogla bi biti organizovana do kraja 2025. godine, pod uslovom da se ispune svi potrebni uvjeti.

“Želimo izbjeći situaciju u kojoj institucije u Bosni i Hercegovini gube vrijeme i tokom 2026. godine, upravo u trenutku kada druge zemlje u regiji koriste svoje vrijeme produktivno kako bi napravile završne korake ka punopravnom članstvu” naglasio je Soreca. Upozorio je da složeno uređenje Bosne i Hercegovine često produžava proces donošenja odluka, ali i da je za uspjeh zemlje nužno osigurati funkcionalnije demokratske institucije sposobne donositi odluke u kraćem roku. Soreca je naveo da pregovori o pristupanju, osim što predstavljaju napredak ka članstvu, nude i priliku za sveobuhvatnu raspravu o institucionalnom uređenju Bosne i Hercegovine.

“Okvir pristupnih pregovora, sa svojom metodologijom klastera i poglavlja, nudi najbolji način za podršku zemlji u uspostavljanju funkcionalnijih demokratskih institucija koje joj omogućavaju da uspije i zauzme svoje mjesto u Evropskoj uniji”, istakao je Soreca.

Podsjetio je da su vlasti Bosne i Hercegovine u septembru usaglasile Reformsku agendu za Plan rasta, čime su pokazale da politička volja može donijeti konkretne rezultate.

“Kada postoji politička volja, moguće je postići konsenzusna rješenja koja donose koristi svima koji žive u ovoj zemlji. Preostalo je tek nekoliko koraka do formalnog pokretanja pristupnih pregovora koji bi trebali imati transformativni učinak na funkcionisanje institucija Bosne i Hercegovine. Sada je vrijeme da se ti koraci naprave” poručio je Soreca.

НАЦРТ ЗАКЉУЧАКА ЕВРОПСКОГ САВЈЕТА О БОСНИ И ХЕРЦЕГОВИНИ: КРИТИКОВАЛИ СПОРОСТ РЕФОРМИ



У Бриселу је 18. и 19.12.2025. године одржано дводневно засједање Европског савјета, тијела Европске уније које окупља премијере и предсједнике свих земаља чланица Европске уније. Ријеч је о редовном засједању које Европски савјет има на шестомјесечној бази, а током којег се расправља о томе у којем смјеру треба ићи ЕУ.

Једна од главних тема на сваком засједању је и проширење ЕУ, услед чега се у закључцима након засједања нашао и извјештај о напретку Босне и Херцеговине.

Прије свега, из Европског савјета у нацрту закључака критикују брзину реформи у нашој земљи. Од Босне и Херцеговине се очекивало да ће до овог засједања коначно направити искорак, те отворити приступне преговоре о чланству у ЕУ. Да би дошло до отварања преговора, наша земља је до овог самита требала усвојити два закона (о ВСТВ-у и Суду БиХ), те именовати главног преговара.

„Савјет констатује да је реформска динамика и даље у застоју и позива све политичке актере да поново усмјере фокус земље на напредак на путу ка ЕУ и да испуне неопходне реформе. Као приоритет, Босна и Херцеговина треба усвојити нови Закон о Високом судском и тужилачком савјету и Закон о судовима, у складу с европским стандардима, те именовати главног

преговарача. Босна и Херцеговина такође треба изградити национални план за усвајање правне стечевине ЕУ (acquis) и хитно именовати националног ИПА координатора“, стоји у овом документу.

Посебно су критиковали област правосуђа и борбе против корупције, с посебним акцентом на поштовање и провођење одлука Уставног суда БиХ.

„Савјет такође примјећује да је остварен одређени напредак у борби против организованог криминала те поздравља ратификацију Споразума о сарадњи с Еуројустом и усвајање Закона о заштити личних података. И даље је потребно успоставити видљиве резултате кроз истраге и пресуде, као и наставити јачање институционалних, планских и координационих капацитета земље у борби против корупције и организованог криминала“, навели су.

У нацрту, односно у дијелу који се односи на Босну и Херцеговину, има и неколико ствари које је Европски савјет похвалило. „Савјет поздравља усвајање Закона о контроли границе и оперативно распоређивање особља Фронтекса након потписивања и привремене примјене Статусног споразума с Фронтексом, те позива Босну и Херцеговину да се у потпуности и без одлагања усклади с визном политиком ЕУ“, пише у нацрту овог документа. Похваљен је и „ограничени напредак“, како су навели, у сегменту темељних права, гдје су нагласили да је потребан интегритет изборног процеса уочи Општих избора наредне године.

Такође, нагласили су и да се требају провести одлуке Европског суда за људска права у Стразбуру. „У вези с институционалним механизмима успостављеним Дејтонским мировним споразумом, Босна и Херцеговина треба провести додатне уставне и изборне реформе како би се осигурала једнакост и недискриминација свих грађана, посебно кроз провођење пресуда Сејдић–Финци и сродне судске праксе Европског суда за људска права. Савјет понавља свој позив на инклузиван процес ограничених уставних и изборних реформи, кроз истински дијалог и у складу с европским стандардима, с циљем уклањања свих облика неједнакости и дискриминације у изборном процесу, нарочито у свјетлу избора 2026. године. Савјет такође подсјећа да одређени број одлука Уставног суда још увијек није у потпуности проведен. Не смију се подузимати кораци који би додатно отежали провођење тих одлука или продубили подјеле“, наводи се у овој тачки.

POSEBNI DIO

ПРЕДСЈЕДАВАЈУЋИ ЗАЈЕДНИЧКЕ КОМИСИЈЕ ЗА ЕВРОПСКЕ ИНТЕГРАЦИЈЕ ПСБиХ ЗДЕНКО ЋОСИЋ УЧЕСТВОВАО ЈЕ У ПОДГОРИЦИ НА РЕГИОНАЛНОЈ КОНФЕРЕНЦИЈИ О УЛОЗИ ЕФИКАСНОГ ПАРЛАМЕНТАРНОГ НАДЗОРА У УНАПРЕЂЕЊУ ПРОЦЕСА ПРИСТУПАЊА ЕУ



Предсједавајући Заједничке комисије за европске интеграције Парламентарне скупштине Босне и Херцеговине Зденко Ћосић учествовао је на регионалној конференцији под називом „Улога ефикасног парламентарног надзора у унапређењу процеса приступања Европској унији“, која се одржавала у Подгорици 08. и 09.10.2025. године.

Циљ конференције коју је, у сарадњи са Скупштином Црне Горе, организовао пројекат ГИЗ-а „Регионална сарадња за европске интеграције“, а који се проводи у оквиру Мреже уреда секретаријата парламентарних комисија/одбора за европске интеграције (Парламентарна мрежа), је представљање Извјештаја о провођењу принципа ефективног парламентарног надзора током 2024. године, који представља наставак активности започетих на окупљању Парламентарне мреже у Валони прошле године.

Отварајући конференцију, предсједник Скупштине Црне Горе Андрија Мандић рекао је да је догађај у Подгорици прилика да се сагледа напредак који су парламенти регије остварили али и да се отворено разговара о изазовима који и даље постоје у процесу европских интеграција.

Предсједавајући Заједничке комисије за европске интеграције ПСБиХ Зденко Ћосић обратио се учесницима конференције, те презентовао активности које је ПСБиХ учинила на европском путу БиХ. „Босна и Херцеговина има застој који је проузрокован тренутном политичком кризом за коју се надам да ће се ускоро окончати, што ће олакшати пут БиХ ка ЕУ“, истакао је Ћосић.

Према ријечима Ћосића, за БиХ је посебно важно испуњење преосталих услова за покретање преговарачког процеса, унутар којег Парламент и Заједничка комисија за европске интеграције требају, поред законодавне функције, дјеловати и с аспекта контроле и подршке раду тијела задужених за преговоре.

Током конференције учесници су нагласили потребу за инклузивношћу преговарачког процеса као и важну улогу парламената како би тај процес имао пуни легитимитет.

**U PARLAMENTARNOJ SKUPŠTINI BIH ODRŽANA XXII
KONFERENCIJA PARLAMENTARNIH ODBORA ZA EUROPSKE
INTEGRACIJE/POSLOVE ZEMALJA OBUHVAĆENIH PROCESOM**

STABILIZACIJE I PRIDRUŽIVANJA U JUGOISTOČNOJ EUROPI (COSAP)



U Parlamentarnoj skupštini Bosne i Hercegovine 18. i 19. studenog 2025. Godine održana je XXII Konferencija parlamentarnih odbora za europske integracije i europske poslove zemalja obuhvaćenih Procesom stabilizacije i pridruživanja u Jugoistočnoj Europi (COSAP), koju je organiziralo Zajedničko povjerenstvo za europske integracije PSBiH, uz potporu Vijeća za regionalnu suradnju (RCC) i njemačkog GIZ-a.

Nakon što je predsjedatelj Zajedničkog povjerenstva za europske integracije Zdenko Čosić otvorio Konferenciju i pozdravio nazočne članove diplomatskog zbora, predstavnike Europskog parlamenta i Europske unije u BiH, kao i kolege parlamentarce iz Albanije, Bosne i Hercegovine, Crne Gore, Sjeverne Makedonije i Srbije, te goste iz Gruzije i Turske, sudionicima Konferencije obratio se veleposlanik Savezne Republike Njemačke u BiH, Nj. E. Alfred Grannas. Tom je prigodom naglasio da njegova zemlja snažno podupire proces europskih integracija zemalja regije Zapadnog Balkana, kao i regionalni dijalog koji, kako je istaknuo, predstavlja važan segment tog procesa i treba dovesti do bolje političke, gospodarske i infrastrukturne povezanosti regije, na čemu se radi i kroz Berlinski proces. Naglasio je da je aktivna uloga parlamenata ključna u procesu europskih integracija te ocijenio kako su parlamenti platforma za izgradnju društvenog i državnog konsenzusa o procesu pristupanja svake zemlje Europskoj uniji. U tom je

kontekstu posebno govorio o potrebi razmjene iskustava i dobrih praksi kroz parlamentarni dijalog zemalja regije, što je i smisao održavanja COSAP-a.

Sudionicima se, u ime zemlje predsjedateljice Vijećem EU, obratio i veleposlanik Kraljevine Danske u BiH, Nj. E. Åge Sandal Møller, koji je naglasio da aktualni geopolitički događaji u svijetu naglašavaju potrebu afirmacije EU kao globalne sile, što je, kako je dodao, ključni prioritet danskog predsjedanja Europskom unijom. U tom je kontekstu govorio i o tome da razvoj globalnih okolnosti nameće potrebu nastavka procesa proširenja, koji EU čini snažnijom na globalnoj razini te joj osigurava stabilno i sigurno okruženje. Naglasio je da Danska podupire proces proširenja na zemlje Zapadnog Balkana, posebno istaknuvši Bosnu i Hercegovinu i činjenicu da je naša zemlja predala Reformsku agendu za Plan rasta, što je ocijenio prekretnicom u procesu europskih integracija BiH.



Uvodno izlaganje imao je i zamjenik glavnog tajnika RCC-a Umut Ergezer, koji je govorio o značaju COSAP-a, parlamentarne diplomacije te ulozi parlamenata u procesu integracije u Europsku uniju.

Prvi od tri panela Konferencije, koji je bio posvećen geopolitičkom kontekstu i njegovu utjecaju na proširenje EU, otvorio je predsjedavajući Izaslanstva Europskog parlamenta u Parlamentarnom odboru za stabilizaciju i pridruživanje između EU i BiH (POSP) Davor Ivo Stier, koji je istaknuo da je proces europskih integracija, iako primarno mirovni projekt, uvijek imao i snažan geopolitički

kontekst. U tom je smislu naglasio da su, nakon ruske invazije na Ukrajinu, status kandidata dobile Ukrajina, Moldavija i Gruzija, dok je proces proširenja dobio na važnosti i postao prioritet europskih institucija, uključujući i zemlje regije Zapadnog Balkana. Govorio je i o Planu rasta kao novom instrumentu EU za Zapadni Balkan, koji, kako je pojasnio, pokazuje da EU neće gubiti vrijeme niti dopustiti širenje negativnog utjecaja drugih država na zemlje regije.

Zamjenik šefa Izaslanstva EU u BiH Adebajo Babajide podržao je održavanje COSAP-a u BiH, te istaknuo da je geopolitička dimenzija znatno utjecala na ubrzanje procesa proširenja Europske unije. Govorio je o napretku koji su tijekom ove godine ostvarile Crna Gora, Albanija, Ukrajina i Moldavija, te se osvrnuo na činjenicu da Bosna i Hercegovina, zbog političkih napetosti, zaostaje na europskom putu. Izrazio je očekivanje da će Europska komisija dati pozitivno mišljenje o Reformskoj agendi koju je BiH dostavila te da bi se, ukoliko BiH usvoji potrebne zakone i imenuje glavnog pregovarača, do kraja ove godine mogla održati međuvladina konferencija i otvoriti pregovori o pristupanju BiH Europskoj uniji.

U raspravi tijekom prvog panela sudjelovali su i članovi Zajedničkog povjerenstva za europske integracije Nenad Vuković, Ilija Cvitanović i Šefik Džaferović, kao i parlamentarci iz Albanije, Sjeverne Makedonije, Srbije, Gruzije i Turske.

Sumirajući raspravu, predsjedatelj Zajedničkog povjerenstva za europske integracije Zdenko Čosić istaknuo je kako je ona pokazala potrebu ubrzanja procesa europskih integracija svih zemalja regije te da, s obzirom na aktualni geopolitički kontekst, nitko ne smije biti izostavljen iz tog procesa. Također je naglasio potrebu jačanja regionalne međuparlamentarne suradnje s ciljem pripreme svih zemalja regije za članstvo u Europskoj uniji. Prema njegovim riječima, parlamentarci su upozorili i na činjenicu da su europske integracije dvosmjerni proces, koji je u interesu i Europske unije i zemalja koje teže članstvu.

Tijekom Konferencije sudionici su se fokusirati i na gospodarsku integraciju i povezanost Zapadnog Balkana kroz trgovinu, financije, infrastrukturu (promet, energetiku i digitalizaciju), gospodarski oporavak i ulaganja, kao i na jačanje uloge parlamenata u procesu pristupanja Europskoj uniji, u kontekstu djelovanja COSAP-a i drugih regionalnih parlamentarnih organizacija.

Naglašena je potreba jačanja regionalne međuparlamentarne suradnje radi snažnijeg nadzora nad izvršnim vlastima, osobito u procesu europskih integracija, kao i pripreme svih zemalja regije za članstvo u Europskoj uniji. Parlamentarci su također upozorili na činjenicu da je proces integracije dvosmjerni, te da je u interesu i Europske unije i zemalja koje teže članstvu u EU.

Na kraju je izražena zahvalnost domaćinu na uspješnoj organizaciji Konferencije te je iskazana potpora Saboru Republike Sjeverne Makedonije kao sljedećem predsjedatelju COSAP-a.

DELEGACIJA PARLAMENTARNE SKUPŠTINE BiH UČESTVOVALA JE NA 74. PLENARNOM SASTANKU COSAC-a U COPENHAGENU

Delegat u Domu naroda Parlamentarne skupštine Bosne i Hercegovine i predsjedavajući Zajedničke komisije za evropske integracije PSBiH Zdenko Čosić učestvovao je na 74. plenarnom sastanku Konferencije parlamentarnih komiteta za poslove Evropske unije (COSAC), koja se, pod danskim predsjedavanjem, održavala 01. i 02.12.2025. godine u Copenhagenu.



Oko tri stotine parlamentaraca, članova komisija/odbora za evropske poslove iz 27 parlamenata država članica Evropske unije, kao i članova Evropskog parlamenta, raspravljali su o temi „Jaka Evropa u svijetu koji se mijenja“, a koja je bila u fokusu šestomjesečnog predsjedavanja Kraljevine Danske Vijećem EU.

Učesnicima Plenarnog zasjedanja COSAC-a obratila se, putem video poruke, predsjednica Evropske komisije Ursula von der Leyen, a uvodna obraćanja imali su i najviši predstavnici danskog Parlamenta i Vlade, te Evropskog parlamenta.

U svom obraćanju Ćosić je podsjetio na to da je prije samo dvije sedmice u PSBiH održana Regionalna konferencija odbora/komisija za stabilizaciju i pridruživanje u jugoistočnoj Evropi (COSAP), na kojoj se razgovaralo o geopolitičkom utjecaju na proširenje, ekonomskoj integraciji, regionalnoj povezanosti i ulozi parlamenata u procesu pristupanja EU. Ocijenio je da danas svjedočimo obnovljenom fokusu EU na proširenje kao geopolitičko ulaganje u mir, sigurnost i zajedničke vrijednosti. „U tom kontekstu razvijaju se novi modeli pristupanja, ali želim naglasiti da nijedna zemlja, posebno u ovim osjetljivim geopolitičkim okolnostima, ne smije biti izostavljena iz procesa proširenja“, poručio je Ćosić.

Upozorio je na činjenicu da je BiH, poput drugih zemalja u procesu, imala određeni zastoј na svom evropskom putu. „Međutim, naša izvršna vlast dostavila je Program reformi, a aktivno pristupamo i implementaciji Plana rasta i nadam se ćemo već uskoro dobiti i glavnog pregovarača. Tokom protekle sedmice Predstavnički dom PSBiH usvojio je niz evropskih zakona. Ovi koraci potvrđuju našu posvećenost i spremnost da uhvatimo korak s reformskim procesima“, istaknuo je Ćosić, te zaključio kako samo uključiv, dosljedan i predvidljiv pristup može omogućiti očuvanje kredibiliteta i jedinstva politike proširenja, što je, kako je naglasio, u interesu i regiona i same EU.

Sektor za Evropsku uniju
Сектор за Европску унију
Sektor za Europsku uniju